

خَطِ پوئس بَلَدِه فِليمون

دُعا و سلام

۱ از طرفِ پوئس، که بخاطرِ مسیحِ عیسیٰ
بندیِ اَسْتُم و از طرفِ برارِ مو تيموتائوس بَلَدِه
دوستِ عزیز و همکارِ مو فِليمون ۲ و بَلَدِه خوار
مو اَپفیه و بَلَدِه همسَنگرِ مو اَرخِیپس و بَلَدِه
جماعتِ ایماندارای که دَ خانِه تُو جم موشه:
۳ فِیض و سلامتی از جانبِ آتِه مو خُدا و مولا
عیسیٰ مسیحِ نَصیب شَمو شُنه.

شُکرگُزاری و دُعا

۴ وختیکه تُو ره دَ دُعا های خُو یاد مُونم،
همیشه خُدايِ خُو ره شُکر-و-سپاس مَوگِیم،
۵ چراکه دَ باره ایمان تُو دَ مولا عیسیٰ و مُحَبَّت

تُو بَلَدِه تمامِ مُقَدَّسِينِ مِيشَنُوم. ٦ دُعَا مُونُم كه شَرِيك كَدُونِ اِيْمَانِ تُو قَدِ دِيْگَرُو تَاثِيْر كُزَارِ شُنِه، تَا تَمَامِ خُوْبِي هَاي رِه پِي بُرِي كه دَ وَسِيْلِه مَسِيْح دَز مُو وُجُوْدِ دَرِه. ٧ اَيِ بَرَار، مُحَبَّتِ تُو خُوْشِي وِ دِلْگَرْمِي كَلُو نَصِيْبِ مِه كَدِه، چَرَاكِه دِلْ هَاي مُقَدَّسِينِ دَ وَسِيْلِه اَز تُو تَازِه شُدِه.

خَاهِشِ پُوْلُسِ اَز فِلِيْمُون

٨ پَس، اِگَر چِه دَ وَسِيْلِه مَسِيْح جُرَاتِ كَدِه مِيْتَنُم كه دَ بِلِه تُو حُكْمِ كَنُم تَا وَظِيْفِه خُو رِه اَنْجَامِ بَدِي، ٩ لِيكِنِ دَ اَسَاسِ مُحَبَّتِ اَز تُو خَاهِشِ مُونُم. مَا، پُوْلُسِ كه يِگِ اَدَمِ پِيْر وِ فِعْلًا بِخَاطِرِ مَسِيْحِ عِيْسَى بَنَدِي اَسْتُم، ١٠ دَ بَارِه بَاچِه خُو اَوْنِيْسِيْمُوْسِ كه دَ دَوْرُونِ بَنَدِي گَرِي مَا اْتِه رُوْحَانِي اَزُو شُدُم، اَز تُو يِگِ خَاهِشِ مُونُم. ١١ اُو سَابِقِ بَلَدِه تُو بِي فَايْدِه بُوْد، وَلِي فِعْلًا اَمِ بَلَدِه اَز تُو وِ اَمِ بَلَدِه اَز مِه فَايْدِه مَنْدِ اَسْتِه. ١٢ اُو رِه كه دِلْ-و-جَانِ مِه اَسْتِه، دَ پِيْشِ اَز تُو پَسِ رَبِي

مُونُم. ۱۳ ما میخاستُم که اُو ره دَ پیش خُو نِگاه
 کُنم تا دَ دَورونی که ما بخاطرِ خوشخبری بَندی
 اَسْتُم، دَ جای ازتُو بَلدِه مه خِدْمَت کُنِه، ۱۴ لیکن
 نَخاستُم که بِدُونِ موافِقَتِ ازتُو کُدَم کاری کُنم
 تا نیکی-و-مِهْرَبانی تُو از رُوی مَجْبُوری نَبَشِه،
 بَلکِه از رُوی رِضایت بَشِه. ۱۵ شاید دَ امزی
 دَلیل اُو بَلدِه یِگ وختِ کم از تُو جدا شُد تا که تُو
 اُو ره بَلدِه همیشه قَد خُو دَشْتِه بَشی، ۱۶ مِگم نِه
 مِثِل یِگ غُلام، بَلکِه باله تر از یِگ غُلام، مِثِل
 بِرارِ عَزیز. خُصُوصاً بَلدِه ازمه اُو عَزیز اَسْتِه،
 ولِی بَلدِه ازتُو کَلوتر، ام از نِگاهِ اِنسانی و ام دَ
 خِدْمَتِ مَولا. ۱۷ پس اگه مَرِه همکار خُو مِیْدَنی،
 اُمُو رِقْم که از مه پذیرایی مُونی ازو ام پذیرایی
 کُو. ۱۸ اگه کُدَم غَلَطی قَد تُو کده بَشِه و یا کُدَم
 چِیز از تُو قرضدار بَشِه، دَ پای ازمه حِساب کُو.
 ۱۹ ما، پوْلُس، قَد دِست خود خُو امی ره نِوِشْتِه
 مُونُم: "ما اُو ره ادا مُونُم." اَلْبَتِه نَمُوگُم ام
 که تُو حتّی جان خُو ره از مه قرضدار اَسْتی.

۲۰ آرے، آی برار، اُمیدوار اَسْتُم که امی فایده
 تُو دَ نامِ مَولا دَز مه بِرَسَه. پس دِل-و-جان مَرَه
 دَ نامِ مَسِیح تازَه کُو. ۲۱ ما بِخاطِرِ اِعْتِمادِی که
 دَ اِطاعَتِ تُو دَرُم، ای رَه نَوشْتَه مُونُم و مِیدَنُم
 که حتّی کَلوتر از چِیزی که تَقاضا مُونُم، انجام
 مِیدی. ۲۲ عِلاه ازی، یگ اُتاق بَلدِه مه آمادِه
 کُو، چُون اُمیدوار اَسْتُم که دَ وَسِیلَه دُعا های
 شُمُو دُوباره دَ پِیش شُمُو اُورده شُنُم. ۲۳ ایپَفراس
 که بِخاطِرِ عِیسی مَسِیح قَد ازمه قتی بَندی
 اَسْتَه سَلام رِبی مُونَه، ۲۴ امچَنان همکارای مه
 مَرَقَس، اَرِستَرخُس، دِیماس و لُوقا. ۲۵ فِیضِ
 مَولا عِیسی مَسِیح قَد رُوحِ شُمُو بَشَه.